

Projektom hidroelektrana u gornjem toku Drine u Bosni i Hercegovini predviđena je gradnja tri hidrocentrale, Buk Bijela, Foča i Paunci.

U pismu Ministarstvu vanjskih poslova Bosne i Hercegovine direktorica UNESCO Centra za kulturnu baštinu Mechtild Rössler zatražila je od bosanskohercegovačkih institucija da se odrede “u vezi sa informacijama o postavljanju kamena temeljca za izgradnju brane na Drini nizvodno od nacionalnog parka Durmitor u Crnoj Gori”. BiH se poziva na poštivanje međunarodne Konvencije “te da ne poduzima bilo kakve mjere koje bi mogle ugroziti kulturno ili prirodno naslijeđe u državama potpisnicama Konvencije”.

Naime, u Foči, opštini na istoku BiH, je 17. maja položen kamen temeljac za izgradnju hidroelektrane Buk Bijela na rijeci Drini, čiju gradnju će finansirati elektroprivrede Srbije i bh. entiteta Republike Srpske u iznosu 220 miliona eura. Kamen temeljac položili su premijerka Vlade Srbije Ana Brnabić i premijer RS Radovan Višković, a u zajedničkom preduzeću Hidroenergetski sistem “Gornja Drina” Elektroprivreda Srbije imaće udio od 51 odsto, a Elektroprivreda RS 49 odsto.

„Ministarstvo vanjskih poslova Bosne i Hercegovine će poduzeti mjere iz svoje nadležnosti te upoznati druge nadležne institucije sa zahtjevima UNESCO-a. BiH mora poštovati međunarodne obaveze i ovo je još jedan pokazatelj da se ovakvi projekti ne mogu realizirati bez saglasnosti državnih institucija“, navela je tim povodom ministrica Turković.

Premijer RS Radovan Višković, je izjavio kako Bosna i Hercegovina nije nadležna za izgradnju hidroelektrane Buk Bijela. Ministarstvo vanjskih poslova je ranije uputilo i notu Republici Srbiji, čija je kompanija investitor u najavljenom projektu zajedno sa kompanijom u vlasništvu jednog od entiteta u BiH.

Izgradnja HE Buk-Bijela je pred Ustavnim sudom BiH nakon što su krajem prošle godine 24 parlamentarca pokrenula postupak, tražeći od te pravosudne institucije da stavi van snage odluku Republike Srpske o davanju koncesije za izgradnju hidroelektrana na Gornjoj Drini. U apelaciji je navedeno kako odluke u vezi s državnom imovinom poput rijeka na međunarodnim granicama mogu biti donijete isključivo na nivou BiH.

Izvor: slobodnaevropa.org